

PEMIKIRAN 'ALĪ BIN ABĪ TĀLIB (R.'A) MENGENAI KONSEP SYURGA (*AL-JANNAH*) DAN NERAKA (*AL-NĀR*)

Oleh:

Wan Zailan Kamaruddin bin Wan Ali

Abstract

Heaven (al-Jannah) and Hell (al-Nār) are two most popular concepts discussed and debated by muslim scholars. Still, the problems arise from the disagreements among them. This article is an attempt to elaborate the view-point of 'Alī bin Abī Tālib (r.'a) on the matter and its comparisons with the other muslim sects and scholars.

1. Introduksi

Syurga (*al-Jannah*) dan Neraka (*al-Nār*) merupakan dua konsep yang popular dan sentiasa mendapat tempat serta perhatian di kalangan para *mutakallim* khususnya dalam perbincangan mengenai konsep Hari Kiamat (*al-Qiyāmah*). Namun demikian, kekeliruan dan percanggahan pendapat tidak dapat dielakkan di kalangan para ulama, sarjana, pemikir muslim dan juga aliran *madhhab* dalam Islam. Sesuatu yang jelas dan pasti adalah bahawa persoalan ini sebenarnya hanya menjadi isu dan topik perbincangan yang agak kontroversi selepas kelahiran pelbagai aliran dan *madhhab* serta kemunculan tokoh ilmu kalam, falsafah dan lain-lain yang sudah bercampuraduk dengan pelbagai pemikiran lain. Justeru, untuk tujuan memahaminya, artikel ini difokuskan untuk melihat pendapat dan pandangan 'Alī bin Abī Tālib (r.'a) yang mendapat pendidikan secara langsung daripada Nabi Muhammad (s.'a.w) sebagai mewakili pemikiran Islam pada zaman awal dan perbandingannya dengan tokoh-tokoh serta aliran-aliran pemikiran yang lain.

2. Konsep Syurga (*al-Jannah*)

2.1 Pengertian *al-Jannah* dari segi bahasa

Perkataan *al-Jannah* biasanya merujuk kepada taman (*bustān*) atau kebun (*ḥadiqah*)

yang dipenuhi atau ditutupi dengan pokok-pokok di dunia.¹ Ini berdasarkan keterangan al-Qur'an yang bermaksud:

*"Sesungguhnya bagi kaum Sabā' itu ada tanda (kekuasaan Allah) di tempat kediaman mereka iaitu dua buah kebun (jannatān) di sebelah kanan dan sebelah kiri."*²

Ibn Manzūr mengatakan perkataan *al-Jannah* atau *al-Jinan* merujuk kepada taman (*al-ḥadiqah*) yang mempunyai pokok-pokok seperti kurma, anggur dan lain-lain menurut percakapan orang Arab. Sekiranya tiada pokok-pokok tersebut, ia hanya dikenali sebagai kebun (*al-ḥadiqah*) sahaja.³ Perkataan *Jannah* yang disertai "al" merujuk kepada syurga sebagai tempat pembalasan baik kerana terdapat pelbagai ganjaran disediakan untuk manusia yang disembunyikan pada masa kini.⁴

Menurut Ibn Manzūr, perkataan *al-Jannah* dalam al-Qur'an dan al-Ḥadīth dikatakan merujuk kepada suatu tempat yang penuh dengan kenikmatan di alam akhirat dengan pokok-pokok yang tebal, lebat dan dahan-dahan yang berjuntai. Syurga dikatakan terdiri daripada dua bentuk; syurga dunia dan syurga akhirat. Di antara kedua-duanya terdapat perbezaan kerana ganjaran nikmat yang disembunyikan dari pengetahuan manusia seperti dijelaskan al-Qur'an yang bermaksud:

*"Seseorang pun tidak mengetahui apa yang disembunyikan untuk mereka iaitu (pelbagai nikmat) yang menyedapkan pandangan mata sebagai balasan terhadap apa yang telah mereka kerjakan."*⁶

Secara ringkas, perkataan *al-Jannah* umumnya mengandungi pelbagai jenis pokok yang tebal dan lebat dengan dahan-dahan yang berjuntai, manakala secara khususnya merujuk kepada tempat yang dipenuhi nikmat yang tidak dijelaskan kepada manusia sebagai ganjaran kebaikan untuk mereka.

¹ E.W.Lane, *Lexicon*, Librairie du Liban, Beirut, 1388/1968 II, h. 463.

² Al-Qur'an, surah Sabā' (34): 15. Lihat juga Surah Sabā' (34): 16; al-Kahfi (18): 39.

³ Ibn Manzūr, *Lisān al-'Arab*, Dār Ṣadīr, Beirut, 1375/1956, XIII, h. 100. Bandingkan Muslim, *Ṣaḥīḥ*, taḥqīq: Muḥammad Fu'ād 'Abd al-Bāqī, Dār Iḥyā' al-Kutub al-'Arabiyyah, Misr, cet. I, 1375/1955, IV, h. 2178.

⁴ E. W.Lane, *op.cit*, II, h. 463; al-Bayḍāwī, *Anwār al-Tanzīl wa Asrār al-Ta'wīl*, Mu'assasah Sya'bān, Beirut, t.t, II, h. 258.

⁵ Ibn Manzūr, *op.cit*, XIII, h. 100.

⁶ Al-Qur'an, surah al-Sajdah (32): 17; Lihat Al-Rāghib, *Mufrādat Alfāz al-Qur'ān*, taḥqīq: Ṣafwān 'Adnān Dawūdī, Dār al-Qalam, Dimasyq, cet. I, 1412/1992, h. 204; B. Carra De Vaux, "Jannah," dlm. *Encyclopedia of Islam (EI)* (1), Leiden, I, h. 1014-1015.

2.2 Pengertian *al-Jannah* dari segi istilah

Dalam al-Qur'an, perkataan *al-Jannah* dan pecahan-pecahannya disebutkan sebanyak 145 kali,⁷ dan di antara ayat-ayat mengenainya adalah seperti berikut:

Pertama: "*Dan orang-orang yang beriman serta beramal soleh, mereka itu penghuni syurga (Jannah), mereka kekal di dalamnya.*"⁸

Kedua: "*Dan bagi orang yang takut akan saat menghadap Tuhannya ada dua syurga (Jannatān).*"⁹

Ketiga: "*Balasan mereka di sisi Tuhan mereka adalah syurga (Jannāt) 'Adn yang mengalir di bawahnya sungai-sungai, mereka kekal di dalamnya selama-lamanya.*"¹⁰

Persoalan syurga turut menjadi bahan perbincangan di kalangan ulama Islam. Di antara isu-isu yang diperdebatkan adalah berkaitan dengan persoalan:

Pertama: Adakah syurga merupakan suatu realiti (*ḥaq*) yang pasti atau hanya bersifat *majāzī* semata-mata?

Kedua: Adakah syurga diciptakan (*makhlūq*) oleh Allah atau bukan?

Ketiga: Adakah syurga akan kekal untuk selama-lamanya atau akan binasa apabila sampai masanya?

Dari pandangan 'Alī bin Abī Tālib (r. 'a) berhubung dengan semua persoalan tersebut, dikatakan bahawa persoalan syurga merupakan suatu realiti dan termasuk ciptaan (*makhlūq*) Allah dan ia sudah pun diciptakan kerana dikatakan terdapat banyak riwayat mengakuinya.¹¹

Dalam persoalan sama ada syurga itu suatu realiti atau *majāzī*, tokoh al-Asya'irah seperti al-Rāzī berpendapat kedua-duanya merupakan realiti berdasarkan keterangan al-Qur'an.¹² Seterusnya dalam persoalan syurga itu diciptakan (*makhlūq*) atau bukan

⁷ 'Abd al-Bāqī, *al-Mu'jam al-Mufahras li-alfāz al-Qur'ān al-Karīm*, al-Maktabah al-Islāmiyyah, Istanbūl, Turkiya, 1402/1982, h. 180-182.

⁸ Al-Qur'an, surah al-Baqarah (2): 82.

⁹ Al-Qur'an, surah al-Rahmān (55): 46.

¹⁰ Al-Qur'an, surah al-Bayyinah (98): 8.

¹¹ Al-Mufīd, *Awā'il al-Maqālāt fī al-Madhāhib wa al-Mukhtārāt*, taḥqīq: Mahdī Muhaqqiq, Mu'assasah Mutāla' Islāmi, Tehran, 1413/1992, h. 102.

¹² Al-Rāzī, *Uṣūl al-Dīn*, Maktabah al-Kulliyāt al-Azhariyyah, al-Azhar, t.t, h.119-120. Lihat Al-Qur'an, surah al-Baqarah (2): 24; Alī 'Imrān (3): 133.

makhlūq, bagi al-Dirāriyyah, al-Jahmiyyah dan sebahagian al-Mu'tazilah, dikatakan ia bukan *makhlūq*. Hujah mereka adalah kerana Adam ('a.s) dikatakan berada di syurga yang merupakan taman-taman dunia, manakala al-Ka'bi sendiri berpendapat ia adalah *makhlūq* dan bukan *makhlūq*. Sekiranya ia *makhlūq*, bererti ia harus binasa dan dikembalikan pada Hari Kiamat. Namun begitu, ia tidak harus binasa selepas dihuni penghuninya.¹³

Tokoh-tokoh al-Mu'tazilah seperti Bisyr al-Mu'tamir,¹⁴ al-Jubbā'i dan Abū al-Husayn al-Baṣrī berpendapat ia telah diciptakan, manakala Abū Hāsyim, 'Abd al-Jabbār¹⁵ dan kebanyakannya mengakui ia belum diciptakan dan hanya akan diciptakan pada hari akhirat.¹⁶ Golongan Khawārij, sebahagian al-Zaydiyyah, al-Dirāriyyah dan al-Jahmiyyah dikatakan bersependapat dengan mereka.¹⁷

Menurut al-Asyā'irah umumnya, syurga adalah ciptaan Allah (*makhlūq*)¹⁸ dan telah pun diciptakan kerana Adam telah dikeluarkan daripadanya,¹⁹ begitu juga dalam peristiwa *al-Mi'rāj* dan lain-lain. Bagaimanapun, al-Rāzī berpendapat sebaliknya.²⁰

Dalam persoalan ia kekal atau binasa, di kalangan al-Mu'tazilah, Abu al-Hudhayl berpendapat syurga kekal begitu juga penghuninya. Allah dikatakan tidak berkuasa atas perbuatan tersebut dan manusia ketika itu, tidak mendapat manfaat atau mudarat.²¹ Menurut al-Asyā'irah pula, umumnya berpendapat syurga akan kekal termasuk nikmat dan azab kepada para penghuninya.²² Bagi Jahm dan al-Jahmiyyah, syurga akan binasa

¹³ *Ibid.*

¹⁴ Al-Ījī, *al-Mawāqif fī 'Ilm al-Kalām*, 'Ālam al-Kutub, Beirut, t.t., h. 254; 270, 273; A.S. Tritton, *Muslim Theology*, Luzac, London, 1366/1947, h. 98.

¹⁵ Al-Ījī, *al-Mawāqif*, h. 375.

¹⁶ Al-Taftāzānī, *Syarḥ al-Maqāṣid*, II, h. 218.

¹⁷ Al-Taftāzānī, *ibid*; al-Baghdadi, *Uṣūl al-Dīn*, Dār al-Kitāb al-'Alamiyyah, Beirut, Cet.II, 1400/1980, h. 237.

¹⁸ Al-Baghdādī, *ibid*, h. 237.

¹⁹ Al-Baghdādī, *ibid*, h. 237-238; al-Ījī, *op.cit*, h. 374; al-Taftāzānī, *op.cit*, II, h.218; A.S.Tritton, *Muslim Theology*, h. 181.

²⁰ Al-Rāzī, *Uṣūl al-Dīn*, h. 119-120.

²¹ Al-Baghdādī, *op.cit*; al-Asy'arī, *Maqālāt al-Islāmiyyin wa Ikhtilāf al-Muṣallīn*, Maktabah al-Nahdah al-Miṣriyyah, al-Qāhirah, Cet. II, 1389/1969, II, h. 148; Ibn Ḥazm, *al-Faṣl Fi al-Milāl wa al-Ahwā' wa al-Niḥal*, Maktabah al-Muthannā, Baghdād, t.t., IV, h. 82; al-Khayyāt, *al-Intiṣār Wa al-Radd 'Alā Ibn al-Rāwandī al-Mulḥid*, taḥqīq: Nyberg (Dr.), Dār al-Nadwah al-Islāmiyyah, Beirut, 1407-1408/1987-1988, h. 52.

²² Al-Khayyāt, *ibid*, h. 52-53; al-Baghdādī, *ibid*, h. 238; al-Asy'arī, *ibid*.

termasuk penghuninya, tiada yang kekal melainkan Allah.²³

Dalam keterangan beliau seterusnya dikatakan bahawa dalam al-Qur'an, perkataan *al-Jannah* digunakan bagi merujuk kepada kediaman orang-orang mu'min di alam akhirat. Menurutnya, selain perkataan tersebut, beberapa perkataan lain juga kadang-kala turut digunakan bersama-sama seperti *Jannah al-'Adn*,²⁴ *Jannah al-Firdaus*,²⁵ *Jannah al-Ma'wā*,²⁶ *Jannah al-Na'im*²⁷ dan *Jannah al-Khuld*.²⁸ Di samping itu, terdapat beberapa perkataan yang mempunyai maksud yang sama iaitu *Dār al-Salām*,²⁹ *Dār al-Ākhirah*³⁰ dan *Dār al-Maqāmah*.³¹

'Alī (r. 'a) menjelaskan bahawa kebangkitan melibatkan aspek-aspek jasmani dan ruhani. Oleh itu, balasan pahala dan azab juga dikatakan turut merangkumi kedua-duanya. Dengan kata-kata lain, syurga menyediakan kebahagiaan, pahala dan kebaikan kepada kedua-dua aspek, jasmani dan rohani. Justeru, syurga merupakan persoalan jasmani dan rohani.³²

Menurut 'Alī bin Abī Ṭālib (r. 'a), syurga adalah tempat pertembungan segala perkara yang boleh dibayangkan dan yang tidak boleh dibayangkan; sama ada dari segi kebahagiaan, keseronokan, kegembiraan dan ketenangan.³³ Ia adalah kediaman

²³ Al-Baghdādī, *Uṣūl al-Dīn*; al-Asy'arī, *Maqālāt*; Ibn Ḥazm, *al-Faṣl*; al-Khayyāt, *al-Intiṣār*, h. 52; al-Malaṭī, *Tanbīh wa al-Radd 'Alā Ahl al-Ahwā' wa al-Bida'*, Istanbul, t.t., h. 106-109.

²⁴ Al-Qur'ān, surah al-Tawbah (9): 72; al-Ra'd (13): 4; al-Hijr (15): 45; al-Kahfi ((18): 31. Lihat 'Abd al-Bāqī, *al-Mu'jam*, h.180-182.

²⁵ Al-Qur'ān, surah al-Kahfi (18): 107.

²⁶ Al-Qur'ān, surah al-Nāzi'āt (79): 41; al-Najm (53): 15; al-Sajdah (32): 19. Lihat 'Abd al-Bāqī, *op.cit.*

²⁷ Al-Qur'ān, surah al-Syu'arā' (26): 85; al-Wāqī'ah (56): 89; al-Ma'ārij (70): 38. Lihat 'Abd al-Bāqī, *ibid*, h. 180-182.

²⁸ Al-Qur'ān, surah al-Furqan (25): 15.

²⁹ Al-Qur'ān, surah al-An'am (6): 127; Yūnus (10): 25. Lihat 'Abd al-Bāqī, *op.cit.*, h. 264.

³⁰ Al-Qur'ān, surah al-Baqarah (2): 94; al-An'ām (6): 32; al-A'rāf (7): 169.

³¹ Al-Qur'ān, surah Fāṭir (35): 35.

³² Lihat Muḥammad Ḥasan, *al-Ma'ād*, Dār Maktabah al-Ḥayāh, Beirut, cet. I, 1397/1972, h. 31-32; Ja'far al-Subḥānī, *al-Ilāhiyyāt 'Ala Hadyi al-Kitāb wa al-Sunnah wa al-'Aql*, Matba'ah al-Quds, cet. III, 1412/1991, IV, h. 276.

³³ Al-Qur'ān, surah al-Sajdah (32): 17.

penuh kedamaian yang berkekalan (*dār al-baqā'*) tanpa sebarang unsur kematian, ketuaan, kesakitan, penyakit, keburukan, halangan, kedukacitaan, kebimbangan dan kemiskinan.³⁴

Berdasarkan keterangan beliau (r. 'a) lagi, syurga dikatakan tidak mengandungi unsur-unsur kebencian, permusuhan, kedengkian dan perbalahan kerana setiap penghuninya merasai kegembiraan yang tidak terhingga, meredhai segala pemberian Allah dan tidak pula mengingini kediaman yang lain.³⁵ Penghuni syurga pula tidak akan merasai kebosanan dan keletihan, sebaliknya mereka akan mendapat segala yang dihajati dan kekal berada di dalamnya untuk selama-lamanya kerana Allah menjadikan syurga untuk orang-orang yang mengenali dan menyembahNya. Mereka seolah-olah menjadi tetangga Allah, berada dalam kelompok manusia yang terdiri daripada nabi-nabi, orang-orang soleh, malaikat *al-muqarrabin*, juga para sahabat dan orang-orang yang dicintai Allah.³⁶

'Alī (r. 'a) juga menjelaskan bahawa semacam ada persamaan antara perbuatan Allah dengan perbuatan manusia di alam Akhirat. Al-Qur'an memperlihatkan bahawa apabila Allah menghendaki sesuatu, Dia hanya mengatakan *kun* dan ia terus menjadi realiti.³⁷ Manusia di syurga juga dikatakan diberikan keistimewaan dapat mencapai keadaan seperti Allah dengan hanya bergantung kepada naluri mereka tanpa memerlukan kekuatan fizikal ataupun peralatan.³⁸

³⁴ Muḥammad 'Abduh, *Syarḥ Nahj al-Balāghah*, Dār al-Andalus, Beirut, 1382/1963, h. 291; al-Hurr al-'Amili, *al-Fuṣūl al-Muhimmah Fī Uṣūl al-A'immah 'Alayhim al-Salām*, al-Maktabah wa al-Matba'ah al-Haydariyyah, al-Najaf, cet. II, 1378/1958, h. 131; al-Syarīf al-Rādī, *Nahj al-Balāghah*, taḥqīq: Ṣubḥī Ṣāliḥ (Dr.), Beirut, cet. I, 1387/1967 (Khutbah no. 109), h. 161-162; *Nahj al-Ḥayāh: Majmū'ah Buḥūth wa Maqālāt Ḥawl Nahj al-Balāghah*, Mu'assasah Nahj al-Balāghah, Tehran, cet. I, t.t. h. 53; al-Mughniyyah, *Fi Zilāl Nahj al-Balāghah: Muḥāwalah li-Fahmin Jadīdin*, (4 vol.), Dār al-'Ilm li-al-Malāyīn, Cet. III, 1399/1979, I, h. 421; Ibn Abī al-Ḥadīd, *Syarḥ Nahj al-Balāghah*, taḥqīq: Muḥammad Abū al-Faḍl Ibrāhīm, Dār Ihyā' al-Turāth al-'Arabī, Beirut, 1385-87/1965-67, VII, h. 200; al-Ṣadūq, *I'tiqadat al-Imāmiyyah*, Wofis, Tehran, 1402/1982, h. 71; Lihat A.J.Wensinck, *The Muslim Creed: Its Genesis and Historical Development*, London, 1385/1965. h. 129, 130, 165, 185, 195, 211, 268.

³⁵ Al-Majlisī, *Biḥār al-Anwār al-Jami'ah li Durar Akhbar al-A'immah al-Athar*, Dār Ihyā' al-Turāth al-'Arabī, Mu'assasah al-Tārikh al-'Arabī, Beirut, 1412/1992, IV, h. 476.

³⁶ Al-Ṣadūq, *op.cit.*, h. 71; al-Mughniyyah, *op.cit.*, III, h. 45.

³⁷ Al-Qur'ān, surah al-Nahl (16): 40.

³⁸ Sayyid Mujtaba, *Resurrection, Judgement and The Hereafter: Lessons on Islamic Doctrine*, Foundation of Islamic Cultural Propagation in The World, t.p., 1413/1992, h. 149.

Beliau menjelaskan para penghuni syurga terdiri daripada orang-orang yang bertaqwa dan soleh dari kalangan wali dan hamba Allah, yang terdahulu (*al-sābiqin*) dan yang taat.³⁹ Ini dikatakan kerana semasa di dunia, mereka melaksanakan amalan dan perbuatan yang baik dengan mata sentiasa menangis, waktu malam seumpama siang dengan kekhusyukan beristighfar dan waktu siang pula ibarat malam dengan banyak berkhawah.⁴⁰ Umumnya, mereka terdiri daripada pelbagai peringkat. Sebahagian dapat menikmati beraneka makanan, minuman, buah-buahan dan juga bidadari (*ḥūr 'ayn*), dan bahkan setiap orang akan menikmati apa yang mereka paling sukai.⁴¹ Secara umumnya, beliau membahagikan mereka kepada tiga kumpulan:

- Pertama: Golongan yang menyembah Allah dengan matlamat memperoleh syurga dan mengharapkan kebaikan daripadaNya.
- Kedua: Golongan yang menyembah Allah dengan matlamat takut kepada neraka-Nya.
- Ketiga: Golongan yang menyembah Allah dengan matlamat cinta kepada-Nya.⁴²

Dikatakan bahawa sebelum manusia meninggalkan dunia ini, mereka akan diperlihatkan tempatnya di syurga terlebih dahulu.⁴³ Dikatakan bahawa golongan yang paling rendah di kalangan penghuni syurga akan diberikan sepuluh kali ganda dari apa yang mereka perolehi semasa di dunia.⁴⁴

Beliau turut memberikan penjelasan mengenai ciri-ciri syurga secara umum kerana dikatakan bahawa manusia tidak mampu memahami ciri-ciri syurga.⁴⁵ Di antaranya dikatakan bahawa dalam syurga, terdapat beberapa buah sungai yang disebutkan nama-namanya dalam al-Qur'an seperti *al-Kawthar*, *al-Salsabil*, *al-Tasnim*

³⁹ Muḥammad 'Abduh, *Syarḥ Nahj al-Balāghah*, h. 377-378; al-Syarīf al-Rādī, *Nahj al-Balāghah*, (Khutbah no. 157), h. 221-222; Ibn Abī al-Ḥadīd, *Syarḥ Nahj al-Balāghah*, VII, h. 201-202; *Nahj al-Ḥayāh*, h. 49-50.

⁴⁰ Muḥammad 'Abduh, *ibid*, h. 291; al-Syarīf al-Rādī, *ibid*, (Khutbah no. 109), h. 161; Ibn Abī al-Ḥadīd, *ibid*, VII, h. 194; *Nahj al-Ḥayāh*, h. 53.

⁴¹ Ibn Abī al-Ḥadīd, *ibid*, VII, h. 200.

⁴² Al-Ṣadūq, *I'tiqādāt*, h. 72.

⁴³ Al-Ṣadūq, *al-Tawḥīd*, Maktabah al-Ṣadūq, Tehran, 1387/1967, h. 74; A.J.Wensinck, *Muslim Creed*, h. 233.

⁴⁴ Al-Ṣadūq, *ibid*, h. 74.

⁴⁵ Al-Qur'ān, surah al-Sajdah (32): 17.

dan *al-Kāfir*.⁴⁶ Begitu juga syurga dikatakan mempunyai enam pintu (*bāb*), di antaranya *Bāb al-Rahmah*, *Bāb al-Ṣabr*, *Bāb al-Syukr*, *Bāb al-Alam* dan *Bāb al-Akbar*. Begitu juga, dari segi bentuk dan jenis, tiada sesuatu yang boleh menggantikan nikmat syurga.⁴⁷ Ia terdiri dari beberapa tingkat⁴⁸ dan peringkat⁴⁹ berdasarkan kebaikan yang dilakukan oleh setiap mu'min semasa mereka berada di dunia.

Dalam syurga juga, tidak ada najis atau bahan buangan⁵⁰ kerana apa yang dimakan dan diminum akan dikeluarkan daripada tubuh mereka dalam bentuk peluh yang mengeluarkan bau yang harum dan wangi. Bagi golongan wanita pula, mereka dikatakan bebas dari haid, mengandung dan kesukaran-kesukaran yang lain. Selain dari itu, cahaya dalam syurga tidak sama dengan cahaya matahari, bulan atau bintang-bintang. Demikian juga, keadaan masa yang dikatakan sentiasa dalam kedudukan di antara fajar (dinihari) dan waktu matahari mulai naik (syuruk) di dunia ini. Hembusan bayu atau udaranya begitu lembut dan nyaman yang pada kebiasaannya dirasakan pada waktu fajar di dunia ini.

Beliau turut menjelaskan bahawa tidak ada seorang nabi pun dibenarkan memasuki syurga sebelum Nabi Muhammad (s. 'a.w). Dikatakan bahawa sebelum orang-orang mu'min memasuki syurga, mereka akan terlebih dahulu ditunjukkan tempat mereka di neraka dan diberitahu bahawa ia akan menjadi kediamannya sekiranya mereka mengingkari perintah Allah.

Menurut beliau, nikmat dalam syurga dikatakan mempunyai beberapa peringkat dan ia berdasarkan kepada tahap spiritual para penghuninya.

Pertama: Sebahagian menikmati seperti lembu menikmati rumput dan nikmat jasmani tersebut adalah seperti yang mereka rasai semasa di dunia.

Kedua: Sebahagian menikmati keseronokan kerana syurga adalah tempat kemuliaan yang dipilih oleh Allah untuk teman-temanNya. Oleh kerana itu, ia adalah tempat yang memperlihatkan keredhaan Allah yang boleh mendekatkan mereka kepadaNya.

⁴⁶ Al-Qur'ān, surah al-Kawthar (108): 1 (*al-Kawthar*); al-Insān (76): 18 (*al-Salsabīl*); al-Mutaffifīn (83): 27 (*al-Tasnīm*); al-Insān (76): 5 (*al-Kāfir*).

⁴⁷ Al-Qur'ān, surah al-Zukhruf (43): 17.

⁴⁸ Muḥammad 'Abduh, *Syarḥ Nahj al-Balāghah*, h. 224; al-Syarīf al-Rādī, *Nahj al-Balāghah*, (Khutbah no.85), h. 116; Ibn Abī al-Ḥadīd, *Syarḥ Nahj al-Balāghah*, VI, h. 348; *Nahj al-Hayāh*, h. 53.

⁴⁹ Al-Mughniyyah, *Fī Zilāl Nahj al-Balāghah*, I, h. 421.

⁵⁰ Lihat sama: Muslim, *Ṣaḥīḥ*, IV, h. 2180-2181.

Di antara beberapa nikmat syurga yang dikemukakan adalah:⁵¹

Pertama: Kebahagiaan terbesar ialah kejayaan memperolehi keredhaan (*riḍwān*) Allah.⁵²

Kedua: Keseronokan jasmani (seksual) kerana setiap mu'min dikatakan memperolehi tujuh puluh ribu orang bidadari selain daripada isteri mereka. Para bidadari itu sentiasa berada dalam keadaan suci setiap kali orang mu'min menginginkan mereka.

Ketiga: Makanan dan buah-buahan yang lazat pada setiap masa dengan rasa yang baru berdasarkan keterangan al-Qur'an yang bermaksud:

*"Setiap mereka diberikan rezeki buah-buahan dalam syurga-syurga itu."*⁵³

Keempat: Hati yang sentiasa gembira, bahagia dan tenang.

Kelima: Perhimpunan dengan rakan-rakan seperti dikatakan:

*"Dan Kami lenyapkan segala rasa dendam yang berada dalam hati mereka, sedang mereka merasa bersaudara duduk berhadap-hadapan di atas dipan-dipan."*⁵⁴

Keenam: Istana dan kediaman diperbuat daripada logam berharga dan dihiasi dengan permata, kebun-kebun yang mengalir sungai-sungai di dalamnya, buah-buahan dan bunga-bunga.

Ketujuh: Pelbagai bentuk keseronokan termasuk nyanyian burung yang hanya diberikan kepada orang yang memelihara diri daripada muzik semasa di dunia.

Kelapan: Pelbagai sungai⁵⁵ mengalir di dalamnya. Dikatakan arak yang disediakan dalam syurga tidak memabukkan dan ia memberikan nikmat tanpa sebarang kesan kepada pancaindera mahupun akhlak manusia. Semua ini diperuntukkan kepada orang yang menjauhi arak semasa mereka hidup di dunia.

⁵¹ Muḥammad 'Abduh, *Syarḥ Nahj al-Balāghah*, h. 399; al-Syarif al-Rādi, *Nahj al-Balāghah*, (Khutbah no.165), h. 239; Ibn Abī al-Hadīd, *Syarḥ Nahj al-Balāghah*, VII, h. 200; *Nahj al-Hayāh*, h. 54; al-Syirāzi, *Tawḍīḥ Nahj al-Balāghah*, Mu'assasah al-Fikr al-Islāmi, Amir, cet. II, 1410/1989, III, h. 16.

⁵² Al-Qur'ān, surah al-Tawbah (9): 72.

⁵³ Al-Qur'ān, surah al-Baqarah (2): 25.

⁵⁴ Al-Qur'ān, surah al-Ḥijr (15): 47.

⁵⁵ Al-Qur'ān, surah Muḥammad (47): 15.

Kesembilan: Pengetahuan bahawa kebahagiaan syurga hanya untuk mereka selama-lamanya tanpa adanya perasaan takut kepada kematian, perpindahan, kesakitan, kebimbangan dan lain-lain.

Kesepuluh: Keredhaan Allah yang sentiasa berlipat ganda, para malaikat sentiasa menziarahi dan ingatan terhadap Allah yang berpanjangan.⁵⁶

Beliau mengatakan keterangan yang terbaik berhubung dengan kenikmatan syurga adalah seperti yang disebutkan dalam sebuah hadith Qudsi berikut (yang bermaksud):

*"Aku telah sediakan untuk para hamba-Ku yang soleh, sesuatu yang mata belum pernah melihatnya, telinga belum pernah mendengarnya dan hati pula belum pernah membayangkannya."*⁵⁷

Keterangan mengenai syurga menurut 'Alī bin Abī Ṭālib (r. 'a) dapatlah diperhatikan menerusi kata-katanya: "Setiap kenikmatan selain syurga adalah keburukan atau kehinaan."⁵⁸

3. Konsep Neraka (*al-Nār*)

3.1 Pengertian *al-Nār* dari segi bahasa

Perkataan *Nār* bermaksud sesuatu yang membakar dan ia merujuk kepada api yang menyala (*lāhib*) dan dapat diperhatikan pancaindera manusia berdasarkan keterangan al-Qur'an yang bermaksud:

*"Maka terangkanlah kepadaku tentang api yang kamu nyalakan (daripada gosokan kayu)."*⁵⁹

Ia juga merujuk kepada kepanasan (*al-ḥarārah*) seperti diterangkan dalam maksud ayat al-Qur'an berikut:

⁵⁶ Al-Qur'ān, surah Yūnus (10): 9-10.

⁵⁷ Muslim, *Ṣaḥīḥ*, IV, h.2174-2175. Lihat: Al-Qur'ān, surah al-Sajdah (32): 17; Qāsim Ḥabīb Jābir, *al-Falsafah wa al-I'tizāl Fī Nahj al-Balāghah*, al-Mu'assasah al-Jāmi'iyah li-al-Dirāsāt wa al-Nasyr wa al-Tawzī', Beirut (al-Hamrā'), cet. I, 1407/1987, h. 116.

⁵⁸ Muḥammad 'Abduh, *Syarḥ Nahj al-Balāghah*, h. 768; al-Syarīf al-Raḍī, *Nahj al-Balāghah*, (Hikam no. 387), h. 544; Ibn Abī al-Ḥadīd, *Syarḥ Nahj al-Balāghah*, XIX, h. 345.

⁵⁹ Al-Qur'ān, surah al-Wāqī'ah (56): 71.

*“Dan peliharalah dirimu daripada neraka yang bahan bakarnya manusia dan batu, yang disediakan bagi orang-orang kafir.”*⁶⁰

Perkataan *Nar* berbentuk *mu'annath* dan kadang-kala *mudhakkār*⁶¹ dan apabila ia dihubungkan dengan “*al*” iaitu *al-Nār*, secara khusus ia merujuk kepada api neraka.

3.2 Pengertian *al-Nār* dari segi istilah

Dalam al-Qur'an, perkataan neraka (*al-Nār*) dikemukakan sebanyak 126 kali⁶² dan di antara ayat-ayat yang berkaitan adalah:

Pertama: *“Peliharalah dirimu daripada neraka (al-Nār) yang bahan bakarnya manusia dan batu, yang disediakan bagi orang-orang kafir.”*⁶³

Kedua: *“Tempat kembali mereka adalah neraka (al-Nār) dan itulah seburuk-buruk tempat tinggal orang-orang yang zalim.”*⁶⁴

Ketiga: *“Sesungguhnya orang-orang munafiq itu (ditempatkan) pada tingkatan yang paling bawah daripada neraka (al-Nār), dan kamu sekali-kali tidak akan mendapat seorang penolong pun bagi mereka.”*⁶⁵

Kelihatan bahawa perkataan *al-Nār* dari kedua-dua perspektif bahasa dan istilah merujuk kepada perkara yang sama. Menurut 'Alī bin Abī Tālib (r.'a), neraka telah tersedia dicipta⁶⁶ kerana Nabi Muhammad (s.'a.w) dikatakan pernah melihat neraka semasa dalam peristiwa *Mi'raj*.⁶⁷ Lantaran itu, kenyataan baginda (s.'a.w) wajib dipercayai. Menurutnya, seperti juga syurga, neraka membabitkan kedua-dua aspek jasmani dan rohani. Ini bererti bahawa neraka menyediakan balasan penderitaan dan azab kepada jasmani dan rohani manusia.

⁶⁰ Al-Qur'ān, surah al-Baqarah (2): 24; al-Ḥajj (22): 72; al-Humazah (104): 6. Lihat Al-Rāghib al-Isfahānī, *Mufradāt*, h. 828.

⁶¹ E.W. Lane, *Lexicon*, VIII, h. 2865.

⁶² 'Abd al-Bāqī, *al-Mu'jam*, h. 723-725.

⁶³ Al-Qur'ān, surah al-Baqarah (2): 24.

⁶⁴ Al-Qur'ān, surah Āli 'Imrān (3): 151.

⁶⁵ Al-Qur'ān, surah al-Nisā' (4): 145.

⁶⁶ Al-Ṣadūq, *I'tiqādāt*, h.73; A.J. Wensinck, *The Muslim Creed*, h. 129.

⁶⁷ Ibn Ḥazm, *al-Faṣl*, IV, h. 81.

Sehubungan dengan persoalan ini, para ulama Islam umumnya berselisih pendapat dalam membahaskan persoalan sama ada ia merupakan suatu realiti atau *majāzī*, diciptakan (*makhlūq*) atau bukan dan persoalan adakah ia kekal atau binasa. Dalam persoalan adakah neraka itu suatu realiti atau *majāzī*, Abū Ḥanīfah dan tokoh al-Asyā'irah seperti al-Rāzī berpendapat, kedua-duanya merupakan realiti berdasarkan keterangan al-Qur'an.⁶⁸

Seterusnya dalam persoalan adakah neraka itu diciptakan (*makhlūq*) atau bukan *makhlūq*, al-Asyā'irah umumnya kecuali al-Rāzī berpendapat,⁶⁹ neraka adalah ciptaan Allah (*makhlūq*)⁷⁰ dan telah pun diciptakan.⁷¹ berdasarkan peristiwa-peristiwa seperti *al-Mi'rāj* dan lain-lain. Bagi al-Dirāriyyah, al-Jahmiyyah dan sebahagian al-Mu'tazilah, dikatakan ia bukan *makhlūq*. Al-Ka'bi berpendapat ia adalah *makhlūq* dan bukan *makhlūq*. Sekiranya ia *makhlūq*, bererti ia harus binasa dan dikembalikan pada Hari Kiamat. Namun begitu, ia tidak harus binasa selepas dihuni penghuninya.⁷²

Tokoh-tokoh al-Mu'tazilah seperti Bisyr al-Mu'tamir,⁷³ al-Jubbā'ī dan Abū al-Husayn al-Basrī berpendapat, ia telah diciptakan, manakala Abū Ḥāsyim, 'Abd al-Jabbar⁷⁴ dan kebanyakannya mengakui ia belum diciptakan dan hanya akan diciptakan pada hari Akhirat.⁷⁵ Golongan Khawārij, sebahagian al-Zaydiyyah, al-Dirāriyyah dan al-Jahmiyyah dikatakan bersependapat dengan mereka.⁷⁶

Dalam persoalan adakah ia kekal atau binasa, al-Asyā'irah umumnya berpendapat neraka akan kekal termasuk azab yang dikenakan kepada para penghuninya.⁷⁷ Di kalangan al-Mu'tazilah, Abū al-Hudhayl berpendapat, neraka akan kekal, begitu juga

⁶⁸ Al-Rāzī, *Uṣūl al-Dīn*, h. 119-120. Lihat Al-Qur'ān, surah al-Baqarah (2): 24; Āli 'Imrān (3): 133; A.J. Wensinck, *The Muslim Creed*, h. 182; J. Robson, "Is the Muslim Hell Eternal," dlm. *Muslim World*, XXVIII, h. 390.

⁶⁹ Al-Rāzī, *ibid*, h. 119-120.

⁷⁰ Al-Baghdādī, *Uṣūl al-Dīn*, h. 237.

⁷¹ Al-Baghdādī, *ibid*, h. 237-238; al-Ījī, *al-Mawāqif*, h. 374; al-Taftāzānī, *Syarḥ al-Maqāṣid*, II, h. 218; A.S Tritton, *Muslim Theology*, h. 181.

⁷² Al-Baghdādī, *Uṣūl al-Dīn*, h. 237-238.

⁷³ Al-Ījī, *al-Mawāqif*, h. 254; 270, 273; A.S. Tritton, *Muslim Theology*, h. 98.

⁷⁴ Al-Ījī, *ibid*, h. 375.

⁷⁵ Al-Taftāzānī, *Syarḥ al-Maqāṣid*, II, h. 218.

⁷⁶ Al-Taftāzānī, *ibid*; al-Baghdādī, *op.cit*, h. 237.

⁷⁷ Al-Baghdādī, *ibid*; al-Asy'arī, *Maqālāt*, II, h. 148; al-Bazdawī, *Uṣūl al-Dīn*, taḥqīq: Hans Peter Linss (Dr.), 'Isa al-Bābī al-Halabī, al-Qāhirah, 1383/1963, h. 244.

penghuninya.⁷⁸ Bagi Jahm dan al-Jahmiyyah, neraka akan binasa termasuk penghuninya, tiada yang kekal melainkan Allah SWT.⁷⁹

Dalam keterangan selanjutnya, al-Qur'an menurut 'Alī bin Abī Ṭālib (r. 'a) menyebutkan bahawa mereka diberikan tujuh⁸⁰ nama atau pintu (*abwāb*), di antaranya di antaranya, Jahīm,⁸¹ Laza,⁸² Saqar,⁸³ Hutamah,⁸⁴ Hāwiyah,⁸⁵ Sa'ir⁸⁶ dan Jahannam.⁸⁷ Dalam keterangan-keterangan lain dikatakan, tujuh pintu neraka ditafsirkan sebagai tujuh peringkat, dan menurut al-Qur'an, neraka yang ketujuh dikatakan yang paling berat azabnya yang dihuni oleh orang-orang munafiq.⁸⁸ Tingkatan pertama adalah untuk orang-orang mu'min yang melakukan dosa dan terpaksa menjalani azab untuk menghapuskan dosa. Bagi orang mu'min, azab yang paling hebat adalah tidak mendapat rahmat Allah seperti yang dihuraikan oleh 'Alī bin Abī Ṭālib (r. 'a) sendiri dalam *Du'ā' al-Kumayl*:⁸⁹

“Sekiranya Engkau hukumku bersama-sama musuh-musuhku, dan Engkau golongkanku dengan penerima bala-Mu, dan Engkau pisahkanku daripada para kekasih dan wali-Mu, maka sekiranya aku dapat bersabar menanggung siksa-Mu, betapa mungkin aku menanggung perpisahan dengan-Mu? Sekiranya aku dapat menanggung kepanasan api-Mu, betapa mungkin aku

⁷⁸ Al-Baghdādī, *ibid*, h. 238; al-Asy'arī, *Maqālāt*, Ibn Ḥazm, *al-Fasl*, IV, h. 82.

⁷⁹ Al-Baghdādī, *ibid*, h. 238; al-Asy'arī, *ibid*; Ibn Ḥazm, *ibid*.

⁸⁰ O'Shaughnessy, Thomas S.J., "The Seven name for Hell in the Quran," dlm. Bulletin of the School of Oriental and African Studies (BSOAS), XXIV, 1961, h. 444-469.

⁸¹ Dalam al-Qur'an, perkataan ini disebutkan sebanyak 26 kali. Lihat 'Abd al-Bāqī, *al-Mu'jam*, h.164-165.

⁸² Dalam surah al-Mā'arij (70): 15-18, hanya satu kali sahaja ia ditemui. Lihat: *Ibid*, 647.

⁸³ Dalam al-Qur'an, perkataan tersebut didapati sebanyak empat kali dalam surah al-Qamar (54): 48; al-Muddaththir (74): 26, 27, 42. Lihat: *Ibid*, h.352.

⁸⁴ Al-Qur'an mengemukakannya sebanyak dua kali dalam surah al-Humazah (104): 4-5; Lihat: *Ibid*, h. 207.

⁸⁵ Dalam al-Qur'an, ia hanya didapati satu kali dalam surah al-Qāri'ah (101): 9. Lihat: *Ibid*, h. 740.

⁸⁶ Dalam al-Qur'an, ia ditemui sebanyak 16 kali. Lihat: *Ibid*, h. 351.

⁸⁷ Dalam al-Qur'an, perkataan ini disebutkan sebanyak 77 kali dan ia merupakan yang terbanyak ditemui. Lihat: *Ibid*, h.184-185.

⁸⁸ Al-Qur'an, surah al-Nisā' (4): 145.

⁸⁹ 'Abbās al-Qummi, *Mafāṭih al-Jinan*, Dār al-Adwā', cet. IV, 1992/1413, h. 93.

dapat bersabar daripada melihat kemuliaan-Mu? Betapa mungkin aku tinggal di neraka sedangkan harapanku bergantung kepada keampunan-Mu?"

Menurutnya (r. 'a) lagi, hanya dengan rahmat Allah (s.w.t) dan syafa'at Nabi Muhammad (s. 'a.w), mereka akan diampuni, dikeluarkan dari neraka, dimandikan dalam telaga *al-Kawthar* dan ditempatkan di syurga.

Beliau turut memberikan penjelasan mengenai ciri-ciri neraka. Menurutnya, neraka merupakan tempat kediaman yang mengandungi segala bentuk keaiban, penderitaan, siksaan, kesengsaraan dan hukuman bersifat kekal abadi dan tidak terputus-putus. Ia juga sebuah tempat yang sempit dan buruk yang penuh dengan segala urusan yang besar lagi menakutkan. Apinya dikatakan terlampau memeritkan manakala keadaannya sangat panas dengan pintu tertutup untuk para penghuninya.⁹⁰ Dalam api itu terdapat suara lolongan dan kebisingan.⁹¹ Kulit manusia yang halus dan tipis menurutnya tidak mampu menanggung azab neraka, manakala keperitan azabnya cuba ditunjukkan olehnya dengan kesakitan tercucuk duri, terjatuh dan melecur. Selain itu, beliau turut cuba menunjukkan keadaannya yang amat dahsyat dengan mengatakan bahawa apabila Malik, penjaga neraka itu sendiri marah, neraka tersebut akan terpecah-pecah.⁹² Neraka disediakan bagi orang-orang yang lalai⁹³ dan yang melakukan maksiat.⁹⁴ Hanya orang-orang kafir dan munafiq dikatakan kekal dalam neraka untuk selama-lamanya sedangkan yang lain, hanya untuk sementara waktu.

Berhubung dengan persoalan orang fasiq (*fussāq*), terdapat perbezaan pendapat mengenainya. Al-Asyā'irah berpendapat Allah akan mengeluarkan *ahl al-qiblah* dari neraka dan tidak mengekalkan mereka selama-lamanya di sana,⁹⁵ sedangkan al-Mu'tazilah dan al-Khawārij mengatakan mereka akan kekal dan tidak akan dapat keluar sama sekali.⁹⁶ Namun, 'Alī (r. 'a) berpendapat para pelaku dosa dan perbuatan

⁹⁰ Muḥammad 'Abduh, *Syarḥ Nahj al-Balāghah*, h. 449; al-Syarīf al-Raḍī, *Nahj al-Balāghah*, (Khutbah no. 190), h. 282; *Nahj al-Ḥayāh*, h. 54-55.

⁹¹ Muḥammad 'Abduh, *ibid*, h. 292; al-Syarīf al-Raḍī, *ibid*, (Khutbah no. 109), h. 161; Ibn Abī al-Ḥadīd, *Syarḥ Nahj al-Balāghah*, VII, h. 194; *Nahj al-Ḥayāh*, h. 53.

⁹² Muḥammad 'Abduh, *ibid*, h. 433; al-Syarīf al-Raḍī, *ibid*, (Khutbah no. 183), h. 267; Ibn Abī al-Ḥadīd, *ibid*, X, h. 113; *Nahj al-Ḥayāh*, h. 55-56.

⁹³ Muḥammad 'Abduh, *Syarḥ Nahj al-Balāghah*, h. 378; al-Syarīf al-Raḍī, *Nahj al-Balāghah*, (Khutbah no. 157), h. 221-222; Ibn Abī al-Ḥadīd, *Syarḥ Nahj al-Balāghah*, IX, h. 209; *Nahj al-Ḥayāh*, h. 49-50.

⁹⁴ Muḥammad 'Abduh, *ibid*, h. 292; al-Syarīf al-Raḍī, *ibid*, (Khutbah no. 109), h. 161; Ibn Abī al-Ḥadīd, *ibid*, VII, h. 201-202

⁹⁵ Al-Taftāzānī, *Syarḥ al-Maqāṣid*, VIII, h. 304.

⁹⁶ Al-Asy'arī, *Maqālāt*, II, h. 148; Ibn Ḥazm, *al-Faṣl* IV, h. 44.

salah dari kalangan orang mu'min akan dikeluarkan darinya dengan rahmat Allah ataupun menerusi syafa'at Nabi Muhammad (s. 'a.w).

Selanjutnya beliau (r. 'a) menjelaskan, pada hakikatnya penghuni neraka akan mengalami penderitaan yang tidak berkesudahan.⁹⁷ Mereka tidak akan diizinkan mati dan hukuman yang diterima pula tidak akan dikurangkan.⁹⁸ Minuman untuk mereka juga dikatakan amat dahsyat, bahkan mereka dikatakan tidak akan merasai sebarang minuman sejuk kecuali air yang mendidih, cecair yang hitam pekat dan juga termasuk nanah.⁹⁹ Sekiranya mereka menginginkan makanan, *zaqqūm*¹⁰⁰ akan diberikan kepada mereka. Begitu juga sekiranya mereka memohon keringanan, air seperti tembaga yang dileburkan akan diberikan kepada mereka hingga melecur dan melepuhkan kulit muka mereka. Mereka dikatakan merintah kepada Allah, tetapi tidak akan diendahkan.

Hadith yang mengatakan Allah (s.w.t) memerintahkan sebahagian manusia ditunjukkan tempatnya di neraka tetapi diberitahu agar kaki mereka tidak dibakar kerana ia digunakan untuk ke masjid, tangan mereka tidak dibakar kerana digunakan untuk berdoa dan lidah mereka tidak dibakar kerana banyak membaca al-Qur'an dan muka mereka tidak dibakar kerana sering berwudhu' dengan baik, dihuraikan oleh 'Alī bin Abī Ṭālib (r. 'a) sebagai merujuk kepada orang-orang yang melakukan amalan-amalan baik bukan kerana Allah tetapi untuk menunjuk-nunjuk kepada manusia lain.¹⁰¹ Lantaran itu, dalam nasihat-nasihatnya, beliau mengingatkan manusia seluruhnya supaya menjaga amanah Allah seperti anggota-anggota tubuh badan mereka dengan baik dan melakukan kebaikan kepada diri, harta¹⁰² dan segala-gala yang lain.

Secara keseluruhan, gambaran neraka menurut pandangan 'Alī bin Abī Ṭālib (r. 'a) dapat dilihat menerusi kata-katanya: "Setiap keburukan (*balā'*) selain neraka adalah kesembuhan (*'āfiyah*)."¹⁰³

⁹⁷ Ibn Abī al-Ḥadīd, *op.cit*, VII, h. 200.

⁹⁸ Lihat: Muslim, *Ṣaḥīḥ*, V, h. 374; Ibn Ḥanbal, *Musnad*, Dār al-Ma'ārif, Miṣr, cet. IV, 1373/1954, IV, h. 130; J. Robson, "Is the Muslim Hell Eternal," dlm. *MW*, XXVIII, h. 391-392.

⁹⁹ Muḥammad 'Abduh, *op.cit*, h. 312; al-Syarīf al-Raḍī, *op.cit*, (Khutbah no. 120), h. 176; Ibn Abī al-Ḥadīd, *op.cit*, VII, h. 288; Qāsim Ḥabīb Jābir, *al-Falsafah*, h. 116.

¹⁰⁰ Dalam al-Qur'ān, perkataan *zaqqūm* didapati sebanyak tiga kali dalam surah al-Sāfāt (37): 62; al-Dukhān (44): 43; al-Wāqī'ah (56): 52; Lihat 'Abd al-Bāqī, *al-Mu'jam*, h. 331.

¹⁰¹ Al-Ṣadūq, *I'tiqādāt*, h. 74.

¹⁰² Muḥammad 'Abduh, *Syarḥ Nahj al-Balāghah*, h. 403; al-Syarīf al-Raḍī, *Nahj al-Balāghah*, (Khutbah no. 168), h. 243; *Nahj al-Ḥayāh*, h. 55-56.

¹⁰³ Muḥammad 'Abduh, *ibid*, h. 768-769; al-Syarīf al-Raḍī, *ibid*, (Ḥikam no. 387), h. 544; Ibn Abī al-Ḥadīd, *Syarḥ Nahj al-Balāghah*, XIX, h. 345.

4. Konklusi

Dalam pembicaraan mengenai konsep syurga, 'Alī bin Abī Tālib (r.'a.) menjelaskan bahawa persoalan tersebut berkaitan dengan kediaman para mu'min di alam akhirat yang melibatkan aspek jasmani dan rohani yang bersifat kekal. Di dalam syurga, terdapat segala bentuk ni'mat yang dapat dibayangkan dan yang tidak dapat dibayangkan oleh akal manusia. Penghuninya pula kekal mendapat segala kehendaknya dan menjadi tetangga Allah bersama-sama dengan insan-insan pilihan Allah yang lain. Syurga menurut beliau (r.'a.) mempunyai pelbagai ciri yang unik dan istimewa. Ia pula dipenuhi dengan ni'mat dengan pelbagai peringkat mengikut tahap spiritual manusia itu sendiri. Syurga disimpulkannya sebagai tempat ni'mat yang mutlak.

Dalam konsep neraka pula, 'Alī bin Abī Tālib (r.'a.) mengatakan ia adalah kediaman orang-orang kafir dan munafiq, dan turut sama membabitkan aspek jasmani dan rohani. Penghuninya terdiri daripada para pelaku maksiat, kezaliman dan seumpamanya. Neraka dikatakan mempunyai tingkat dan peringkat. Neraka digambarkan sebagai kediaman yang penuh dengan kesengsaraan tanpa kesudahan dan pengurangan. Ia disimpulkan sebagai tempat yang penuh dengan keburukan tanpa adanya apa-apa kebaikan sama sekali.